



ATASSUT

UPA14/175-1

Gerhardt Petersen

03.06.2014

Apeqquyteqaat aallaavigalugu teknologimut nutaamut misileraavimmik assersuutigalugu qillerinernut, avatangiisinik eqqarsaatiginninnermut uuliakoortoqarsimatillugulu salinernut atatillugu ilinniarfinnut, aatsitassarsiornermi ingerlatseqatigiiffinnut kattuffinnullu allanut ilisimatusarnermi, misileraanermi takussutissiornermilu neqeroorffiusartussamik pilersitsinissaq pillugu oqallisissiatut siunnersuut.

(Inatsisartunut ilaasortaq Naaja H. Nathanielsen, Inuit Ataqatigiit)

ATASSUT-mit Inatsisartunut ilaasortap Naaja H. Nathanielsen-ip Inuit Ataqatigiinneersup apeqquyteqaat aallaavigalugu oqallisissiatut siunnersuutaa imatut oqaaseqarfigissavarput:

Siullermik siunnersuuteqartooq ATASSUT-mit qutsavigissavarput oqallisissiatut siunnersuummik saqqummiussaqaqneranut ullutsinni pissutsinut soqutiginaateqarluartumik.

ATASSUT-mit siunnersuuteqartup siunnersuuteqarnermini ilaatigut tunngavilersuutai tassaasut: ”Kalaallit Nunaat nunaavoq ilisimatuut tikillutillu aallaqqittartut soqutigisarujussuat, tamatigulli imaattannngilaq ilisimatusarnerat nunatsinni sorlanittartooq” paasilluarsinnaakutsoorpavut aammalu isumaqatigisinnaalluarlutigit, taamaattorli maannakkut ATASSUT-mit piffissaasorinngilarput misileraavimmik pilersitsinissamut tamanna tunngavigissallugu naammattooq.

ATASSUT-mit pingaaruteqarsorivarput eqqaamaniassallu siorna aatsaat Inatsisartut ukiakkut ataatsimiinneranni inatsisitigut tunngavissinneqarmat namminneq maani Kalaallit Nunaanni Ilisimatusarnermik Siunnersuisoqatigiinnik pilersitsisinnaanissaq, tamanna periarfissaalerpoq Ilisimatusarnermut siunnersuisarneq ilisimatusarnermullu aningaasaliisarneq pillugit Inatsisartut inatsisaat nr. 5, 29. november 2013 atuutilersinneqarmat, taamaasillunilu ukioq manna aallarnerfigalugu Ilisimatusarnermik Siunnersuisoqatigiit pilersinneqarlutik.



ATASSUT INATSIARTUNI

ATASSUT-mit pingaartilluinnarparput aamma siunnersuuteqartoq isumaqatigaarput Kalaallit Nunaanni ilisimatusartut suliai annerusumik nunatsinni sorlanittalernissaat sulissutigineqartariaqartoq.

Taamaattumik ATASSUT-mit naatsorsuutigaarput Ilisimatusarnermik Siunnersuisoqatigiit qanoq Kalaallit Nunaanni ilisimatusaatit annerusumik nunatsinni sorlanittalersinnaaneri aammalu inerititaqarfiullutillu inuiaqatigiittut ineriartornitsinnut iluaqutaasinnaaneri, siunnersuisoqatigiittut sulinerminni suliaqarfigiumaaraat.

Aammattaaq ATASSUT-mit pinngitsoorusunngilagut manna iluatsillugu ukiuni kingullerni Ilisimatusarfiup, Sanaartornermi Ilinniarfiup minnerunngitsumillu aamma Pinngortitaleriffiup annertusingaluttuinnartumik Issittumi ilisimatusarnernut assigiinngitsorpassuarnut suleqataanerisa annertusingaluttuinnarnerinut qujassuteqarfigissallugit – alloriarnerit tamarmik pingaaruteqarluinnarput, maannakkullu suliniutit aallartinneqareersimasut inerisarneqartuarnissaat pingaaruteqarluinnartut ATASSUT-mit nalilerumavagut.

Taamatut ATASSUT-mit apeqquteqaat aallaavingalugu oqallisissiatut siunnersuummut ilanngussivugut, neriuppugullu aamma ilisimatusarnermik suliallit manna oqallinneq malinnaaffigalugu isumassarsiffigiumaarai oqariartuutit matumani anninneqartut, ilanngullugu aamma Naalakkersuisut akissuteqarnerminni oqaaseqaatai tusaatissatut tigullutigit qujassutigivagut.